



蜜羅波若般足具應薩菩

「大智度論」集粹之十八

佛說：「菩薩於一切法不著故，應具足般若波羅蜜。」菩薩從初發心，求一切種智，於其中間，知諸法實相慧，是名般若波羅蜜。蓋佛所得智慧是實波羅蜜，因是波羅蜜故，菩薩所行，亦名波羅蜜，因中說果故。是波羅蜜，在佛心中，變名爲一切種智，菩薩行智慧，求度彼岸，故名波羅蜜。佛已度彼岸，故名一切種智。

佛一切諸煩惱及習已斷，智慧眼淨，應如實得諸法實相，諸法實相即是般若波羅蜜。菩薩未盡漏，慧眼未淨，而亦謂爲得諸法實相者；是佛則窮盡其底，菩薩未斷諸煩惱習，勢力少故，不能深入。菩薩智慧雖與煩惱習合，而能得諸法實相。佛爲大燈，照諸器物，皆悉分了。菩薩爲小燈，亦能照物。是故菩薩亦得諸法實相。

何謂諸法實相？所謂諸法實相者，不可破壞，常住不異，無能作者。佛在後品中語須菩提：若菩薩觀一切法，非常非無常，非苦非樂，非我非無我，非有非無等，亦不作是觀，是名菩薩行般若波羅蜜。是義：捨一切觀，滅一切言語，離諸心行，從本以來，不生不滅，如涅槃相。一切諸法相亦如是，是名諸法實相。

般若波羅蜜可獨稱「摩訶」，五波羅蜜則否。蓋般若言慧，波羅蜜言到彼岸。以其能到智慧大海彼岸。到一切智慧邊，窮盡其極故，名到彼岸。一切世間、十方、三世，諸佛第一大，次有菩薩、辟支佛、聲聞。是四大人皆從般若波羅蜜生。是故得名摩訶——大。而般若波羅蜜，能與衆生大果報，無量無盡，常不變異，所謂涅槃。五波羅蜜則不能爾。布施等如離般若波羅蜜，但能與世間果報，是故不得名大。

智慧者，般若波羅蜜攝一切智慧故，菩薩求佛道，應當學一切法，得一切智慧，所謂聲聞、辟支佛、佛智慧。是智慧有三種：學、無學、非學非無學。非學非無學智者：如乾慧地，不淨、安那般那，欲界繫四念處、煖法、頂法、忍法、世間第一法等。學智者：苦法智忍慧，乃至向阿羅漢、第九無礙道中金剛三昧慧。無學智者：阿羅漢第九解脫智，從是已後，一切無學智，如盡智、無生智等。求辟支佛道智慧亦如是。

智 銘

辟支佛道與菩薩道之分別，道雖一種，而用智有異。若諸佛不出，佛法已滅，是人先世因緣故，獨出智慧，不從他聞，自以智慧得道。思一切世間無常變壞，思惟是已，無漏道心生，斷諸結使，得辟支佛道，具六神通。如是等因緣，先世福德、願行、果報，今世見少因緣，成辟支佛道，如是爲異。

辟支佛道有二種：一名獨覺、二名因緣覺。因緣覺者，因外緣和合內緣而生覺。獨覺者，是人今世成道，自覺不從他聞，是名獨覺辟支佛。獨覺辟支佛有二種：一、本是學人，在人中生，是時無佛、佛法滅。是須陀洹已滿七生，不應第八生，自得成道。是人人名佛，不名阿羅漢，名爲小辟支佛，與阿羅漢無異。或有不加舍利弗大阿羅漢者。二、大辟支佛，於一百劫中作功德，增長智慧，得三十二相分，或有三十一相，或三十相，或二十九相，乃至一相。於九種阿羅漢中，智慧利勝，於諸深法中總相、別相能入，久修習定，常樂獨處。如是相，名爲大辟支佛。以是爲異。

求佛道者，從初發心作願，願我作佛，度脫衆生，得一切佛法，行六波羅蜜，破魔軍衆及諸煩惱，得一切智，成佛道，乃至入無餘涅槃。隨本願行，從是中間所有智慧，總相、別相一切盡知，是名佛道智慧。是三種智慧能盡知，盡到其邊。以是故，言到智慧邊。

所以說若世間、若出世間，一切智慧盡應入，而又但言三乘智慧盡到其邊，不說餘智盡到其邊者，蓋三乘是實智慧，餘者若是虛妄，菩薩雖知而不專行。若餘處或有好語，皆從佛法中得，自非佛法。初聞似好，久則不妙。如佛法語及外道語；不殺、不盜、慈愍衆生，攝心離欲，觀空等語雖同。然外道語，初雖似妙，窮盡所歸，則爲虛誑。一切外道皆着我見，若實有我，應墮二種：若壞相，若不壞相，若壞相，應如牛皮，若不壞相，應如虛空。此二處無殺罪，無不殺福。若如虛空，雨露不能潤，風熱不能乾，是則墮常相。若常者，苦不能惱，樂不能悅。若不受苦樂，不應避禍就福。若如牛皮爲風雨所壞，則墮無常，若無常則無罪福。外道語若實如是，何有不殺爲福，殺生爲罪？蓋諸外道以

我心逐禪故，多愛、見、慢故，不捨一切法故，無有實智慧。

外道雖亦觀空，但其無實智慧者，因外道雖觀空而取空相，雖知諸法空而不自知我空。愛著觀空智慧，而非實智慧。外道雖有無想定力，強令心滅，非實智慧力。又於此中生涅槃想，不知是和作法，以是故墮顛倒中。是中心雖滅，得因緣還生。外道雖更有非有想非無想定，是中看似無一切妄想，但是中實有想，細微故不覺。若無想，佛弟子復何緣更求實智慧？佛法中，是非有想非無想中識，依三衆住。是四衆屬因緣故無常，無常故苦，無常苦故空，空故無我，空無我故可捨。外道愛著智慧故，不得涅槃。外道依止初禪，捨下地欲，乃至依非有想非無想處，捨無所有處，上無所復依，則不能捨非有想非無想處。以更無依處，恐懼失我，畏墮無所得中故。

外道經中，有聽殺、盜、淫、妄語、飲酒，言爲天祠咒殺無罪。爲行道故，若遭急難，欲自全身而殺小人無罪。又有急難，爲行道故，除金，餘者得盜取以自全濟，後當除此殃罪。除師婦、國王夫人、善知識妻、童女，餘者逼迫急難，得邪淫。爲師及父母，爲牛、爲身、爲媒故，聽妄語。寒鄉聽飲石蜜酒，天祠中或聽嘗一滴、二滴酒。佛法中則不然，於一切衆生慈心等視，乃至蟻子亦不奪命，何況殺人？一鍼一縷不取，何況多物？無主淫女，不以指觸，何況人之妻女？戲笑不得妄語，何況故作妄語？一切酒，一切時常不得飲，何況寒鄉，天祠？外道與佛法懸殊，有若天地。外道法，是生諸煩惱處，佛法則是滅諸煩惱處。是爲大異。

諸佛法無量，有若大海，隨衆生意故，種種說法，或說有，或說無，或說常，或說無常，或說苦，或說樂，或說我，或說無我。或說勤行三業，攝諸善法，或說一切諸法無作相。如是等種種異說，無智聞知，謂爲乖錯，智者入三種法門，觀一切佛語皆是實法，不相違背。何等是三門：一者，昆勒門。二者，阿毗曇門。三者，空門。三者，空門。昆勒有三百二十萬言，佛在世時，大迦旃延之所造。佛滅度後，人壽轉減，憶識力少，不能廣誦，諸得道人，撰爲三十八萬四千言。若人入昆勒門，論議則無窮

，其中有隨相門、對治門等種種諸門。

隨相門者：如佛說偈：

諸惡莫作，衆善奉行，自淨其意，是諸佛教

是中心數法盡應說，今但說自盡其意，則知諸心數法已說，何以故？同相同緣故。如佛說四念處，是中不離四正勤、四如意足、五根、五力。何以故？四念處中：四種精進，則是四正勤，四種定，是爲四如意足。五種善法，是爲五根、五力。佛雖不說餘門，但說四念處，當知已說餘門。如佛於四諦中，或說一諦、或二、或三。如馬星比丘爲舍利弗說偈：

諸法從緣生。是法緣及盡。我師大聖主。是義如是說。

此偈但說三諦，當知道諦已在中不相離故。如是等名爲隨相門。

對治門者：如佛但說四顛倒：常顛倒、樂顛倒、我顛倒、淨顛倒。是中雖不說四念處，當知已有四念處義。若說四念處，則知已說四倒。四倒則是邪相，若說四倒，則已說諸法。所以者何？說其根本，則知枝條皆得。如佛說一切世間有三毒。說三毒當知已說三分、八正道。若說三毒，當知已說一切諸煩惱毒。十五種愛是貪欲毒。五種瞋是瞋恚毒，十五種無明是愚癡毒。諸邪見、慢、疑屬無明。如是一切諸使，皆入三毒。以何滅之？三分、八正道，當知已說一切三十七品，如是等種種相，名爲對治門。是諸法，名爲毘勒門。

何名阿毘曇門？或佛自說諸法義，或佛自說諸法門。諸弟子種種集述解其義。如佛說：有比丘於諸有爲法，不能正憶念。欲得世間第一法，無有是處。若不得世間第一法，欲入正位中，無有是處。若不入正位，欲得須陀洹、斯陀含、阿那含、阿羅漢，無有是處。有比丘於諸有爲法正憶念，得世間第一法，斯有是處。若得世間第一法，入正位。入正位，得須陀洹、斯陀含、阿那含、阿羅漢，必有是處。如佛直說世間第一法，不說相義，何界繫、何因緣、何果報，從世間第一法，種種聲聞所行法，乃至無餘涅槃，一一分別相義，是名阿毘曇。

空門者：生空、法空。如頻婆娑羅王迎經中，佛告大王：色生時但空生，色滅時但空滅，諸行生時但空生，滅時但空滅。是

中無吾我、無人、無神，無人從今世至後世，隨因緣和合名字等衆生，凡夫愚人逐名求實。如是等經中，佛說生空。法空者：如佛說大空經中：十二因緣，無明乃至老死，若有人言是老死，若言誰老死，皆是邪見。生、有、取、受、愛、觸、六入、名色、識、行、無明，亦如是。若有人言：身即是神，若言身異於神，是二雖異，同爲邪見。佛言：身即是神，如是邪見，非我弟子。身異於神，亦是邪見，非我弟子，是經中，佛說法空。若說誰老死，當知是虛妄，是名生空，若說是老死，當知是虛妄，是名法空。乃至無明亦如是。

佛說梵網經中，六十二見：若有人言神常，世間亦常，是爲邪見，若言神無常，世間無常，是亦邪見。神及世間常亦無常，神及世間非常亦非非常，皆是邪見。以是故，知諸法皆空，是爲實。

一切法實皆無常，非實即是無常。佛處處說無常，亦處處說不滅。如佛告摩訶男：「汝勿怖勿畏，汝是時不生惡趣，必至善處……若身壞死時，善心意識長夜以信、戒、聞、施、慧熏心故，必得利益，上生天上。」若一切法念念生滅無常，佛云何言諸功德熏心故必得上生。以是故，知非無常性。

無常不實，佛說無常者，是隨衆生所應而說法，佛破常顛倒故，說無常。以人不知不信後世故，說心去後世，上生天上，罪福業因緣，百千萬劫不失。是對治悉檀，非第一義悉檀。諸法實相，非常非無常，佛亦處處說諸法空，諸法空中亦無無常，以是故，說世間無常是邪見，是故名爲法空。如是等處處聲聞經中，說諸法空。

摩訶衍空門者，一切諸法，性常自空，不以智慧方便觀故空。如佛爲須菩提說：「色、色自空。受、想、行、識、識自空。十二入、十八界、十二因緣、三十七品、十力、四無所畏、十八不共法、大慈大悲、薩婆若，乃至阿耨多羅三藐三菩提，皆自空。無罪無福人，不言無今世，但言無後世，如草木之類，自生自滅。或人生、或人殺，止於現在，更無後世生。而不知觀身內外有自相皆空。再者，邪見人多行衆惡，斷諸善事，觀空人，善法

尚不欲作，何況作惡？

那見破諸法令空，觀空人知諸法真空，不破不壞。邪見人，言諸法皆空無所有，取諸法空相戲論。觀空人，知諸法空，不取相，不戲論。邪見人，雖口說一切空，然於愛處生愛，瞋處生瞋，慢處生慢，癡處生癡，自誑其身。如佛弟子實知空，心不動，一切結使生處不復生。譬如虛空，煙火不能染，大雨不能濕。如是觀空，種種煩惱不復著其心。邪見人言無所有，不從愛因緣出，真空名從愛因緣生，是為異。四無量心諸清淨法，以所緣不實故，猶尚不與真空智慧等，何況此邪見？是見名為邪見，真空見名為正見，行邪見人，今世名為弊惡人，後世當入地獄。行真空智慧人，今世致譽，後世得作佛。

真空中，有空空三昧，邪見空雖有空，而無空空三昧。觀真空人，先有無量布施、持戒、禪定，其心柔軟，並諸結使薄，然後得真空。邪見中無此事，但欲以憶想分別，邪心取空。無智人，聞空解脫門，不行諸功德，但欲得空，是為邪見斷諸善根。如是等義，名為空門。

若入此三門，則知佛法義，不相違背。能知是事，即是般若波羅蜜力，於一切法無所罣礙，若不得般若波羅蜜法，入阿毗曇門則墮有中，若入空門則墮無中，若入毘勒門，則墮有無中。菩薩摩訶薩行般若波羅蜜，雖知諸法一相，亦能知一切法種種相，雖知諸法種種相，亦能知一切法一相。菩薩如是智慧，名為般若波羅蜜。

菩薩觀諸法一相，所謂有相。因是有，諸法中有心生，如是等一切有。菩薩觀一切法一相，所謂無相。如牛中無羊相，羊中無牛相。如是諸法中，各各無他相。如先言，因有故有心生，是法異於有，異故應無。若有法是牛，羊亦應是牛。何以故，有法不異故。若異則無，如是等一切皆無。菩薩觀一切法一，因是一法，諸法中一心生。諸法各各有一相，合眾一故名為二，名為三。一為實，二、三為虛。菩薩觀諸法有所因故有。如人身無常，何以故，生滅相故。一切法皆如是，有所因故有。一切法無所因故有，如人身無常生滅故，因生滅故知無常。此因復應有因，如

是則無窮，若無窮則無因。若是因更無因，是無常因亦非因，如是等一切無因。菩薩觀一切法有相，無有法無相者，如地堅重相，水冷濕相，火熱照相，風輕動相，虛空容受相，分別覺知是為識相。有此有彼，是為初相，有久有近，是為時相，濁惡心惱眾生，是為罪相，淨善心愍眾生，是為福相。著諸法，是為縛相。不著諸法，是為解脫相。現前知一切法無礙，是為佛相。如是等一切各有相。菩薩觀一切法皆無相，是請相從因緣和合生，無自性故無。如地、色、香、味、觸四法和合故名為地，不但色故名為地，亦不但香、但味、但觸故名為地。何以故？若但色是地，餘三則不應是地。地則無香、味、觸亦如是。復次，是四法云何是一法？一法云何為四法？以是故，不得以四為地，亦不得離四為地。

因四法故地法生，但四法不同於地法，從四法生地，地與四法異。如父母生子，子則異於父母。若爾者，今眼見色，鼻知香，舌知味，身知觸，地若異此四法者，應更有異根、異識知。若更無異根、異識知，則無有地。地雖有堅相，但眼見是色，如水中月，鏡中像，草木影，則無堅相，堅相身根觸知故。若眼見色是地，堅相是地種，眼見色亦是水、火、濕、熱相是水、火種。若爾者，風、風種，亦應分別而不分別。如說：何等是風？風種。何等風種？風。若是一物，不應作二種答。若是不異者，地及地種不應異。如是種種因緣，地相不可得，若地相不可得，一切法相亦不可得。是故，一切法皆一相。

以無相破諸法相，若有無相相，則墮諸法相中。無相皆破諸法相，亦自滅相。是故，聖人行無相、無相三昧，破無相故。復次，菩薩觀一切法不合、不散、無色、無形、無對、無示、無說。一相所謂無相。如是等諸法一相。

云何觀種種相？一切法攝入二法中，所謂名、色，色、無色，可見、不可見，有對、無對，有漏、無漏，有為、無為等，二百二法門，如千難品中說。復次，有二法：忍法、柔和。又二法：親敬、供養。二施：財施、法施。二力：慧分別力、修道力。二具足：戒具足、正見具足。二相：質直相、柔軟相。二法：定

、智。二法：明、解脫。二法：世間法、第一義法。二法：念、巧慧。二諦：世諦、第一義諦。二解脫：待時解脫、不壞心解脫。二種涅槃：有餘涅槃、無餘涅槃。二究竟：事究竟、願究竟。二見：知見、斷見。二具足：義具足、語具足。二法：少欲、知足。二法：易養、易滿。二法：法隨、法行。二智：盡智、無生智。如是等種種無量二門。

復次、知三道：見道、修道、無學道。三性：斷性、離性、滅性。三修：戒修、定修、慧修。三菩提：佛菩提、辟支佛菩提、聲聞菩提。三乘：佛乘、辟支佛乘、聲聞乘。三歸依：佛、法、僧。三住：梵住、天住、聖住。三增上：自增上、他增上、法增上。諸佛三不護：身業不護、口業不護、意業不護。三福處：施、戒、善心。三器械：聞器械、離欲器械、慧器械。三輪：變化輪、示他心輪、教化輪。三解脫門：空解脫門、無相解脫門：無作解脫門。如是等無量三門。復知四法：四念處、四正勤、四如意足、四聖諦、四聖種、四沙門果、四知、四道、四攝法、四依、四通達善根、四道、四天人輪、四堅法、四無所畏、四無量心、如是等無量四法門。復知五無學象、五出性、五解脫處、五根、五力、五大施、五智、五阿那含、五淨居天處、五治道、五智三昧、五聖分支三昧、五如法語道，如是等無量五法門。復知六捨法、六愛敬法，六神通、六種阿羅漢、六地見諦道、六隨順念、六三昧、六定、六波羅蜜，如是等無量六法門。……如是等思惟道中一百六十二道，思惟道能破煩惱賊。百七十八沙門果，八十九有爲果，八十九無爲果，如是等種種無量異相法，生、滅、增、減、得、失、垢、淨，悉能知之。菩薩摩訶薩知是諸法已，能令諸法入自性空，而於諸法無所著，過聲聞、辟支佛地，入菩薩位中。入菩薩位中已，以大悲憐愍故，以方便力分別諸法種種名字，度衆生令得三乘。

菩薩摩訶薩，不說空是可得可著，若可得可著，不應說諸法種種異相。不可得空者，無所罣礙，若有罣礙，是爲可得，非不可得空。若菩薩摩訶薩知不可得空，還能分別諸法，憐愍度脫衆生，是爲般若波羅蜜力。取要言之，諸法實相，是般若波羅蜜。

一般世俗經書中，爲安國全家，身命壽樂故非實。外道出家墮邪見法中，心愛著故，是亦非實。聲聞法中雖有四諦，以無常、苦、空、無我觀諸法實相，以智慧不具足不利，不能爲一切衆生，不爲得佛法故，雖有實智慧。不名般若波羅蜜。如說：佛入出諸三昧，舍利弗等乃不聞其名，何況能知？何以故？諸阿羅漢、辟支佛於初發心時，無大願，無大慈大悲，不求一切諸功德，不供養一切三世十方佛，不審諦求知諸法實相，但欲求脫老、病、死苦。諸菩薩從初發心，宏大誓願，有大慈悲，求一切諸功德，供養一切三世十方諸佛，有大利智，求諸法實相。除種種諸觀：所謂淨觀、不淨觀、常觀、無常觀、樂觀、苦觀、空觀、實觀、我觀、無我觀。捨如是等妄見心力諸觀。但觀外緣中實相，非淨、非不淨，非常、非非常，非樂、非苦，非空、非實，非我、非無我。如是等諸觀，不着不得，世俗法故，非第一實義。周徧清淨，不破不壞，諸聖人行處，是名般若波羅蜜。

佛以方便說法，行者如所說行，則得般若波羅蜜。初發心菩薩，若從佛聞，若從弟子聞，若於經中聞，一切法畢竟空，無有決定性可取著，第一實法滅諸戲論。涅槃相是最安隱，我欲度脫一切衆生，云何獨取涅槃？我今福德、智慧、神通力未具足故，不能引導衆生，當具足是諸因緣，行布施等五波羅蜜。財施因緣故得大富，法施因緣故得智慧，能以此二施，引導貧窮衆生，令入三乘道。以持戒因緣故，生人天尊貴，自脫三惡道，亦令衆生免三惡道，以忍辱因緣故，障瞋恚毒，得身色端正，威德第一，見諸歡喜，敬信心伏，況復說法？以精進因緣故，能破今世後世福德，道法懈怠、得金剛身、不動心。以是身心，破凡夫憍慢，令得涅槃。以禪定因緣故，破散亂心，離五欲罪樂，能爲衆生說離欲法。禪是般若波羅蜜依止處，依是禪，般若波羅蜜自然而生。如經中說：比丘一心專定，能觀諸法實相。

欲界中多以慳貪罪業，閉諸善門，行檀波羅蜜時，破是二事，開諸善門。欲令常開故，行十善道口波羅蜜。未得禪定、智慧，未離欲故，破尸羅波羅蜜。以是故行忍辱。知上三事，能開福門，又知是福德果報無常，天人受樂，還復墮苦，厭是無常福德故

，求實相般若波羅蜜。是云何當得？必以一心，乃當可得。如貫龍王寶珠，一心觀察，能不觸龍，則價值閻浮提。一心禪定，除却五欲、五蓋欲得心樂，大用精進。是故，次忍辱說精進波羅蜜。如經中說：行者端身直坐，繫念在前，專精求定，正使肌骨枯朽，終不懈退，是故精進修禪。若有財而施，不足為難，畏墮惡道，恐失好名，持戒、忍辱亦不為難。以是故，上三度中不說精進，今為般若波羅蜜實相，從心求定，是事難故，應須精進。如是行，能得般若波羅蜜。

諸波羅蜜有二種：一者、一波羅蜜中相應隨行，具諸波羅蜜。二者，隨時別行波羅蜜，多者受名。譬如四大共合，雖不相離，以多者為名。相應隨行者，一波羅蜜中，具五波羅蜜，是不離五波羅蜜，得般若波羅蜜。隨時得名者，或因一因二，得般若波羅蜜。若人發阿耨多羅三藐三菩提心布施，是時求布施相，不一不異，非常非無常。非有非無等，如彼布施中說。因布施實相，解一切法亦如是。是名因布施得般若波羅蜜。或有持戒不惱眾生，心無有悔，若取相生著，則起諍競。是人雖先不瞋眾生，於法有憎愛心，故而瞋眾生。是非，若欲不惱眾生，當行諸法平等，若分別是罪是無罪，則非行尸羅波羅蜜。何以故？憎罪，愛不罪，心則自高，還墮惱眾生道中。是故，菩薩觀罪者、不罪者，心無憎、愛。如是觀者，是為但行尸羅波羅蜜，得般若波羅蜜。菩薩作是念：若不得法忍，則不能常忍。一切眾生未有逼迫能忍，苦來切已，則不能忍，譬如囚畏杖楚，而就死苦。以是因緣故，當生法忍，無有打者、罵者，亦無受者，但從先世顛倒果報因緣故名為受。是時不分別，是名事忍。法忍者，深入畢竟空故，是名法忍。得是法忍，常不復瞋惱眾生，法忍相應慧，是般若波羅蜜。

精進常在一切善法中，能成就一切善法。若智慧籌量分別諸法，通達法性，是時精進助成智慧。又知精進實相，離身心，如實不動，如是精進能生般若波羅蜜。餘精進如幻、如夢，虛誑非實，是故不說，若深心攝念，能如實見諸法實相。諸法實相者，不可以見聞念知能得，何以故？六情、六塵，皆是虛誑因緣果報

，是中所知所見，皆亦虛誑。是虛誑知，都不可信。所可信者。唯有諸佛於阿僧祇劫所得實相智慧。以是智慧，依禪定一心，現諸法實相，是名禪定中生般若波羅蜜。

或有離五波羅蜜，但聞、讀誦、思惟、籌量通達諸法實相，是方便智慧中生般若波羅蜜。或從二、或三、四波羅蜜生般若波羅蜜。如聞說一諦而成道果，或聞說二、三、四諦，而得道果。有人於苦諦多惑故，為說苦諦而得道，餘三諦亦如是。或有都惑四諦故，為說四諦而得道。如佛語比丘：汝若能斷貪欲，我保汝得阿那含道，若斷貪欲，當知志癡亦斷。六波羅蜜中亦如是。為破多慳貪故，說布施法，當知餘惡亦破。為破雜惡故，具為說六。是故，或一一行，或合行，普為一切人故說六波羅蜜，非為一人。

菩薩不行一切法，不得一切法故，得般若波羅蜜。所以者何？諸行皆虛誑不實，或近有過，或遠有過，如不善法近有過罪，善法久復變異時，著者能生憂苦，是遠有過罪，譬如美食、惡食，俱有雜毒，食惡食即時不悅，食美食，即時甘悅。久後俱奪命故，二不應食，善。惡諸行亦如是。佛之所以說三行：梵行、天行、聖行者，行無行故，名為聖行，何以故？一切聖行中，不離三解脫門故。梵行、天行中，因取眾生相故生，雖行時無過，後皆有失。又即今求實，皆是虛妄。若賢聖以無著心行此二行，則無咎。若能如是行無行法皆無所得，顛倒虛妄煩惱畢竟不生。如虛空清淨故，得諸法實相，以無所得為得，如無所得般若中說。

色等法非以空故空，從本以來常自空。色等法非以智慧不及故無所得，從本以來常自無所得。是故，不應問行幾般若波羅蜜得般若，諸佛憐愍眾生，隨俗故說行，非第一義。無所得有二種：一者、世間欲有所求，不如意，是無所得。二者、諸法實相中，決定相不可得故名無所得。非無有福德智慧，增益善根。如凡夫人，分別世間法故有所得，諸善功德亦如是，隨世間心故，說有所得。諸佛心中，則無所得。如是畧說般若波羅蜜義，菩薩應修、應行、應具足般若波羅蜜。